

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. i 38. Pravilnika o licencama ("Službeni glasnik BiH", broj 38/05), a u vezi člana 70. Pravilnika o licencama ("Službeni glasnik BiH", broj 87/12), Državna regulatorna komisija za električnu energiju, na sjednici održanoj 27. decembra 2012. godine, donijela je

ODLUKU

O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Izdaje se licenca Javnom preduzeću "Elektroprivreda Bosne i Hercegovine" d.d. Sarajevo za obavljanje djelatnosti međunarodne trgovine električnom energijom.
2. Licenca iz tačke 1. ove odluke izdaje se za period od 1. januara 2013. godine do 31. decembra 2017. godine.
3. Sastavni dio licence su Uvjeti za korištenje licence za obavljanje djelatnosti međunarodne trgovine električnom energijom.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

JP "Elektroprivreda Bosne i Hercegovine" d.d. Sarajevo (u daljem tekstu: podnosilac zahtjeva) vlasnik je licence za obavljanje djelatnosti međunarodne trgovine električnom energijom, upisane u Registar licenci kod ove Komisije pod registracijskim brojem: 05-28-235-14/07 od 27. decembra 2007. godine, čije trajanje ističe 31. decembra 2012. godine.

Shodno pravu da koristi mogućnost obnove licence i ispunjavajući obavezu iz člana 28. Pravilnika o licencama ("Službeni glasnik BiH", broj 38/05) da najkasnije 180 dana prije isteka važnosti posjedujuće licence, izrazi svoju namjeru da djelatnost međunarodne trgovine električnom energijom nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem: 05-28-12-239/12 od 29. juna 2012. godine. O podnijetom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu.

Zahtjev je podniet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnieti uz zahtjev ili predočeni naknadno na zahtjev DERK-a, omogućili DERK-u da razumije, razmatra i odlučuje o podnijetom zahtjevu o čemu je DERK obavijestio podnosioca zahtjeva svojim aktom broj: 05-28-12-239-4/12 od 26. jula 2012. godine.

Po pregledu i provjeri svih formalnih elemenata zahtjeva DERK je najprije 9. augusta 2012. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 24. augusta 2012. godine za dostavljanje komentara javnosti na podnieti zahtjev za izdavanje licence.

DERK konstatira da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom jer je svih prethodnih godina korištenja licence permanentno potvrđivao svoje tehničke, pravne i finansijske mogućnosti i pružao dokaze da ima osigurane resurse, organizirane uvjete i utvrđene profesionalne standarde da nastavi obavljati istu djelatnost.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti međunarodne trgovine električnom energijom dao je osnova DERK-u da pristupi obnovi licence, odnosno pripremi početne verzije Uvjeta za korištenje licence za obavljanje djelatnosti međunarodne trgovine koja bi važila novih pet godina. Ovaj dokument je od 10. septembra 2012. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 18. septembra 2012. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Komentari podnosioca zahtjeva izloženi na javnoj raspravi, u najkraćem, istrajavaju na identičnim stavovima koje je i ranije zastupao. Ti stavovi potvrđuju pravo regulatora da od korisnika licence zahtijeva podatke i informacije neophodne za provedbu regulatornih ovlaštenja ali negiraju obavezu korisnika licence da regulatoru omogući pristup njegovim dokumentima, poslovnim knjigama i arhivi. I ovaj put ih DERK ocjenjuje restriktivnim interpretacijama Zakona o prijenosu kojima se ograničava razumno pravo regulatora na pristup izvornim dokumentima jer zakonski pojam „informacija i podataka“ uključuje, i u svom značenju neizostavno sublimira, sve materijale koji sadrže činjenice, odnosno relevantne dokumente kojima se potvrđuje istinitost i autentičnost traženih podataka i informacija za koje je regulatorno tijelo zainteresirano.

Komentari izloženi u naprijed navedenom smislu nisu utjecali na promjenu uvjeta za korištenje licence i prijedlog da se zatražena licenca izda, koji je podnosiocu zahtjeva dostavljen aktom DERK-a, broj: 05-28-12-239-18/12 od 23. oktobra 2012. godine. Kako u ostavljenom roku do 1. novembra 2012. godine podnosilac zahtjeva nije isticao nove komentare, iako ne odustajući od svojih ranijih zapažanja, bilo je osnovano zaključiti da prijedlog smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući okolnost da je podnosilac zahtjeva korisnik prethodno pribavljene dozvole Regulatorne komisije za električnu energiju u Federaciji Bosne i Hercegovine za obavljanje djelatnosti snabdijevanja električnom energijom drugog reda na teritoriji Bosne i Hercegovine, registracijski broj: 06-03-684/18/09 od 16. decembra 2009. godine, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u BiH, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-12-239-20/12

27. decembra 2012. godine

Tuzla

Predsjedavajući Komisije

Milorad Tuševljak